

## L'é nasciù la "Neva Sozietà de la Bandiera"

L Grop de la Mèscre de Cianacei e Gries à metù sù endodanef l grop con bandiera, guanc e statut

Cianacei - "Vedù che al 1° de firé del 1887 anter i signores Francesco Dantone president, G.B. Valentini vize president, Simone Bernard assistent, Giacomo Dantone assistent, Giacomo Riz assistent, Clemente Soraperra assistent, col fin de ruè a na piú forta agregazion sozièla ti pajjes de Cianacei e Gries, ma ence per sèn patriotism e identità sozièla ladina, fè stat metù sù na sozietà co l'nom de "Sozietà de la Bandiera", ... en memoria de la persones dites sunsora, i signores Mario Lino Debertol, Lorenzo Piazza, Manuel Winterle, Sergio Iori, Silvano Planchensteiner, Carlo Fosco, Guglielmo Lorenz, vel endò meter sù la soziazion per ge dèr nef sbunf al spirit de partegnuda a la comunanza ladina, descheche l'era stat fat tel passà, e i se indentifichèa amò aldidanché tel pien respet de duta la leges e tradizions culturèles. Dit chest dantfora, i signores é d'acort a meter sù na soziazion de promozion sozièla e culturèla con l'nom de "Neva Sozietà de la Bandiera" de la Frazions de Cianacei e Gries..."

Coscita disc l nef statut de la "Neva Sozietà de la Bandiera" prejentèda ofizialmenter en vender ai 8 de jugn te sala de Consei de Comun de Cianacei. L'è passà 130 egn da chel prum statut che metea jù fins e regoles de chela sozietà, egn che à portà straoujimec te ogne ciamp, ma no tel spirit de la jent, che de generazion en generazion se à passà fort e gaert: chel de se dèr jù per tegnir vives la tadizions, la cultura e l sens de partegnuda a la comunanza ladina.

Chel spirit fè restà vif tel grop de la Mèscre de Cianacei e Gries che belapontin à sostegnù la pissèda de sse president Mario Lino Debertol. "Sion stolec de prejentèr la Neva Sozietà de la Bandiera – à dit Mario Lino tedant a autoritèdes e amisc – che aon podù meter en pe de gra al didament economich de la Frazions de Cianacei e Gries, del Comun de Cianacei, del Comun general de Fascia, de la Region e del Bim Adesc. Assane volù la prejentèr jà del 2017, tel cedeon giust di 130 egn, ma l lurier de endrescida é stat piú lonch de chel che se assane spetà."



La bandiera de la "Neva Sozietà de la Bandiera" de Cianacei e Gries.

### La neva bandiera ge va dò a la Burschen Fahne de Cianacei

L lurier de enrescida per meter en pe la neva sozietà e se endotèr de na neva bandiera é stat portà dant da Claus Soraperra de la Zoch, che tel prejentèr sie lurier fà moscià dantfora n depent del cognosciù pitor Bansky, fat da na fotografia de Joe Rosenthal, che aea tout jù n grop de sudé endèna che i piantèa la bandiera americhèna sul mont Suribachi. Bansky al post de la bandiera americhèna fà depent l logo de McDonald's, chest depent l'è doventà na icona per la neva generazions, l fèsc veder purampò che sion globalisé, che sion doventé duc valives. "Se ancheondi podon se conzeder de prejentèr na neva bandiera – à dit Claus Soraperra – vel dir che aon amò zeche da dir en cont de noscia identità." Claus fà rejonà de la veiora bandieres de Fascia ajache al scomenz del nefcent ogne Regola aea sia bandiera, descheche per auter l'è documentà bel delvers te na lingia de depenc fac da Franzeleto Bernard per cont de Hugo de Rossi del 1912 conservé te la Biblioteca Ferdinandum de Dispruch (na sia reproduzion se la troa ence ti archivies de l'Istitut cultural ladin). Da chisc depenc se vegn a saer che estra la bandiera de la Regola te vèlch cajo l'era ence chela di Fenc, la Burschen Fahne, che vegnia durèda dai conseric en ocasion de nozes, carnascères, batum e auter. Belapontin aldò de chesta bandiera

l'è stat dezidù la foja e i colores de la Bandiera de la Neva Sozietà. Donca da una pèrt fà doi fasces neigras sunsora e junsot piú strentes che l'autres e dapò fà autra set fasces: trei biences, doi checenes, una sala e una bruna, con na dopia fila de pontes en or ju. Da l'autra pèrt enveze l'è su i doi blasons de la Frazions de Gries e de Cianacei, copies di depenc de Virgilio Soraperra de la Zoch sun Cèsa Bernard Tabach, la scritta Grop de la Mèscre e la dates 1887-2017. La ponta del mènech la é dedichèda al Bufon ajache l'è su la stica e l cucaloch. Ensema con la bandiera l'è stat envezà ence neves guants per bandierèl e sotecouda, aldò de l'idea de Claudia Conta, descheche se pel lejer te l'articol chibò apede.

E dapò l'è stat metù jù l nef statut e tout sù la pruma inscinuazions. Ben segur che la regoles del grop é states modernisèdes ajache tel prum statut les era n muie rigoroses.

La "Neva Sozietà de la Bandiera" tolarà pèrt a sègres e festes demò ti pajjes de Cianacei e Gries e la jirà olache i arà gust de la chiamèr. Pel se scriver ite i sentadins d Cianacei e Gries, al cost de 25 euro e chi che se enscinua arà derit de aer semper la bandiera a sia festes. Vegn domanà demò l cost de la speises vives, chel che vegn tirà sù jirà per rencurèr vèlch capitel o Crist de paisc.

L president Mario Lino Debertol ge à sport n fort rengraziament a la doi nones de la bandiera che l'è Erna Pedratscher e Zita Pitscheider.

Monica Cigolla